

O'zLiDePdan Prezidentlikka Shavkat Mirziyoyev nomzodi tasdiqlandi



2016-yil 19-oktabr kuni Toshkent shahrida Tadbirkorlar va ishbilarmonlar harakati – O'zbekiston Liberal-demokratik partiyasining VIII syezdi bo'lib o'tdi. Unda Qoraqalpog'iston Respublikasi, viloyatlar va Toshkent shahridan saylangan 300 ga yaqin delegat qatnashdi.

Syezd ishtirokchilari tomonidan yurtimizda har tomonlama o'zini oqlagan islohotlarning davomiyligini, Vatanimizdagi tinchlik va osoyishtalik, xalqimiz farovonligini ta'minlash yo'lida faol ish olib borish vakillik organlarida eng ko'p deputatlik o'rinaliga ega bo'lgan yetakchi siyosiy kuch sifatida O'zLiDeP uchun bundan buyon ham asosiy maqsad bo'lib qolishi ta'kidlandi.

Mamlakatimiz taraqqiyotining xozirgi bosqichida O'zLiDePdan O'zbekiston Respublikasi Prezidentligiga nomzod sifatida mustaqilligimizni yanada mustahkamlash, o'tgan yillar davomida yurtimizda amalga oshirilgan rivojlanish yo'lini yangi, yuksak bosqichga ko'tarishga qodir, islohotlarning tub mohiyatini aniq biladigan, ularni amalga oshirish jarayonlarining faol ishtirokchisi bo'lgan, xalq taqdirini o'z taqdiri bilan chambarchas bog'lab, doimo el-yurt tashvishi bilan yashaydigan, tashabbuskor va tashkilotchi shaxs nomzodini ilgari surish zarurligi alohida qayd etildi.

Ana shu holatlarni hamda syezd delegatlarining chiqishlarida o'z aksini topgan saylovchilar va ko'p sonli partiya elektorati vakillari fikrlarini inobatga olgan holda, Tadbirkorlar va ishbilarmonlar harakati – O'zbekiston Liberal-demokratik partiyasining syezdi bo'lajak saylovda O'zbekiston Respublikasi Prezidentligiga keng miyosli islohotlarni amalga oshirish, mustaqil davlatchilik asoslarini barpo etish va mustahkamlashda, bozor tamoyillariga asoslangan mutlaqo yangi iqtisodiy tizimni shakllantirishda O'zbekistonning Birinchi Prezidenti Islom Karimovga uzoq yillar yelkadosh bo'lib ishlagan, o'zining butun mehnat faoliyatini Vatanimiz ravnaqiga bag'ishlab kelayotgan inson, o'zining amaliy faoliyati bilan yurtdoshlarimiz orasida haqli ravishda katta hurmat va obro'-e'tibor qozongan, partiya Siyosiy Kengashining a'zosi Shavkat Miromonovich Mirziyoyev nomzodini ko'rsatish to'g'risida qaror qabul qildi.

Tadbirda O'zLiDeP tomonidan ko'rsatilayotgan nomzod shu yilning 4-dekabrida bo'lib o'tadigan saylovda xalqimiz tomonidan qo'llab-quvvatlanishiga ishonch bildirildi.

Syezdda O'zbekiston Respublikasi Prezidenti lavozimiga nomzod Shavkat Mirziyoyev o'z saylovoldi dasturining asosiy yo'nalishlari haqida ma'ruza qildi.

Syezd qaroriga ko'ra O'zLiDeP qonunda belgilangan tartibda O'zbekiston Respublikasi Prezidentligiga partiya nomzodini ro'yxatga olishni so'rab O'zbekiston Respublikasi Markaziy saylov komissiyasiga murojaat etadi.

O'zA